

學

福

齋

集

學福齋集

卷之十五

碑

墓表

寧海將軍惠獻貝子功德碑

南臺山天后廟碑

平海天后廟碑

通奉大夫巡撫福建等處地方提督軍務都察院
右副都御史贈光祿大夫敏惠潘公神道碑

朝議大夫都轉鹽運使司運同栖靜張君墓碑

接引菴義塚碑

翰林院編脩沈瞿菴先生墓表

翰林院待詔小湖高先生墓表

東莞蘇冠二墓表

學福齋集卷十五

雲間 沈大成 學子

寧海將軍惠獻貝子功德碑代

維天篤生

聖皇肇造區夏奠安神人以開億萬世無疆之祚則必
誕毓忠勇材智之臣近在宗藩爲國宣力以保乂我
王家其殊尤偉蹟旣彪炳天潢巍然玉牒矣而盛德在
人謳思戶祝愈久而愈不能忘若閩人之戴寧海將軍
惠獻貝子豈非亘古今塞穹壤與周召比烈者與康熙
十三年耿逆拒命阻兵謀以閩應吳尚二逆浙東所在

告警

聖祖仁皇帝知貝子神武素有戰功殲海寇鄭國姓于
漳泉閩人憚其威名特拜寧海將軍偕和碩康親王督
師討之秋八月大軍至杭州是時精忠所遣僞帥曾養
性已由福寧渡海陷溫逼台別攻處州矣貝子與康親
王計議急浙而緩閩浙東平則逆賊無藩籬之固閩不
難破也遂與王分兵趨台州台之屬縣已爲賊據時由
抄掠我糧食貝子至首復仙居十四年五月遂從閑道
入黃巖蹙賊于樂清上亭嶺水陸夾攻賊大敗潰去九
月樂清太平青田大荆磐石五城皆下初貝子之分兵

也紹興之嵊縣亦陷于賊別遣將攻下之因撫定其民
于是杭台數百里道路無梗故得一意討賊十五年二
月貝子已解處州之圍遂引兵而東是時曾養性聚平
陽瑞安石塘羣盜于溫尚十餘萬貝子親臨行陳連戰
敗之進逼城濠沈其船于江賊皆溺死曾養性裸而跳
遂克溫州曾養性旣敗收合餘燼走保得勝山掘塹爲
濠引水環之連營固守貝子乘大霧潛師登山將士皆
踰濠苦戰賊不得出復大敗遂定溫溪石塘雲和行收
龍泉慶元等縣賊氣沮散降者相繼而精忠遂坐困于
閩凡大小之戰百餘得府縣城寨百五十六斬其文武

僞官九百六十五人其朱飛熊吳長春尤賊驍將倚爲
腹心者也生降其士卒四十餘萬鹵獲軍資器械無算
悉定紹台溫處四郡之地貝子已定浙東遂引兵由慶
元間道入松溪與康親王會于建寧賊望風宵遁九月
進攻延平賊將耿繼美郭忠孝等猶城守不下貝子不
忍閩人揃刃之慘遣使許以不死繼美等遂率僞官六
百八十八人兵一萬一百二十人民十一萬二千一百
三十七人開門出降先是海寇鄭經規取福州所遣僞
都統徐堯有賊三萬軍鳳山嶺上貝子旣至揮將士急
擊之賊望見我軍旗幟怵于漳泉之威不戰而走連拔

其營十四斬獲過半窮追四十餘里于是狂醜震恐面
縛乞命興泉漳汀相率反正兵不血刃而全閩底定矣
貝子御軍嚴整用法無私知人善任使又能與士卒同
甘苦謀定而後戰故所向有功所攻必克方貝子由桐
溪出青田身先諸將手率所乘馬以渡失足折其指軍
行之次帳幕不時至露宿野外蓋自督師以來侵冒寒
暑踐履險阻出入于深山窮海之間三年不少休以是
積勞疾作至建寧乘舟而行鳳山之捷猶強起力疾督
戰大功甫就而歌虞及焉其盡瘁定國不以死生疾病
牽其志故士益感動用命當

王師之入閩也貝子疾已甚而教誠將士所下城邑民老幼婦女不驚市不易肆農不去田旣俘精忠振旅入福州四郊晏然不知有金革之事嗚呼仁義之師轉溝壑爲袵席貝子掃殄之功在浙而生全之德在閩矣乾隆四年鎮國將軍德公以閩浙之節式茲土實維貝子之文孫爲世大儒用能克紹先德以仁義爲治文武率職邦人大和因議建貝子祠于烏石山之陽以祀春秋從民志也逾年八月之朔某奉命來權撫事而工適竣因得虔脩時祀有金濬老人自言少時曾見貝子于軍中歷歷前陳其事僚吏將佐肅然動容階下之人有

泣下者旣藩臬之大夫礪石來請文夫以貝子之豐功
盛德勒鐘鼎而垂史乘聲光爛然豈某弇鄙所能爲役
惟是博徵文獻實以老人之言而知閩人之心之思之
久其何可不書以慰之也系曰

上帝降鑒活此下民

真人首出電激雷震函夏耆定航索悉臣聖子神孫式
敘三辰慶流屬籍角定振振曰天生德寧我兆人聞有
凶慝彼昏卒狂煽脅醜類繹騷南方與滇粵賊蟠結披
猖肆其機牙而拒斧斬遂犯浙東以搖江右

天子曰咨我撫之厚而敢同逆其胡可宥玉節金鉞貝

子是授貝子拜命誓師于杭天兵四臨賊氣沮喪麾蓋所指我武孔揚遂落其距亦掩其吭藩羊穴鼠散避犇亡浙東旣靖師次于閩自建臨延盡降其軍狂賊失據自繫牙門閩地悉定重爲王民

天子有言布我恩信罪止其魁餘無所問旣掩鴟鴞旣卹旣賑門迎子女伍戢兵刃吾粲吾粥吾褚吾襦吾有家室貝子子之貝子之來爲閩除賊功成而薨閩人大戚年歲有極吾思曷息是作新廟道山之陽其筵肆肆籩鉶大房何以薦之黍稷膾臚孝孫來享來拜于庭是貽是繩降登旁皇貝子有孫繫閩之福閩人熙熙以介

以敷揭虔妥靈春秋齋邀刻詩于碑永耀南服

南臺山天后廟碑

代閩督喀爾吉善公

南臺山去福州城九里崇阜屹立俯瞰閩江舊名釣臺
山東越王餘善曾釣于此築臺曰釣龍後曰越王臺曰
南臺山今則盡忘其故直呼之曰南臺矣閩江濫觴浦
城合建延邵汀諸郡之水奔流千里而入海珍貨所趨
烟火萬家大艤高颶洪濤無際而百年以來倚爲垂恩
儲祉去苗捍患者厥惟天后之神寶宮其土凡出封之
朝使入貢之陪臣與夫海賈之往來舟師之陳肄農田
水旱之不時胥走而禱焉其昭明肸蠁應若桴鼓其灼
然見于贊記者宋宣和中路允迪使高麗七舟俱覆獨

迪之舟賴神獲濟于是始建順濟之廟乾道二年閩大
疫神降于白湖揚泉以療之于是始膺夫人之秩明永
樂時內監鄭和通道西洋累得神祐于是始晉天妃之
封我

朝德盛懷柔神尤效靈初平臺灣繼殲寇亂師捷而速
繫神之助于是始加天后之鴻號臺廈湄洲並頒

御書用顯靈貺而茲廟之扁則雍正十一年前總督郝
公玉麟具疏特請者也銀榜赤文熠爚扶桑典禮崇重
視古益備焉其始作之年月已不可考自明萬歷甲辰
至今凡四脩而又將壞矣余以閱戰艦來謁廟下將謀

重繕藩臬諸君忻然倡捐因屬其役于閩令吳君商于
茲者咸樂輸助庶用以集乾隆己巳十二月鼓臯召匠
而海防同知郝君歸自邵武勸督益力今年九月廟成
糜白金一千六百面江繚以周垣屏其前由左右掖而
入中爲門門三塗門內爲饗殿後爲屋以祀其土神大
門之外廣場戲棚其旁移則官府將事者息焉東偏則
棲僧之舍也材良而工堅繡桷金鋪軒檻連延彤采之
飾爛若雲烟二君可謂有勞矣郝君名霆雍正甲辰進
士霸州人吳君名至慎丙辰舉人

平海天后廟碑

代

環赤縣神州吐雲霓含龍魚洪濤瀾汗萬里無際者海也自東極以暨占交濱海郡縣百列置水犀戈船之師餘皇赤馬沿鐵數萬歲時陳肆是飭戎政所以宣天聲耀威靈衛中區讐八裔而茫茫積流潮波汨起固象鯨鯢跋蹠而偃者實惟天后之神提挈祝融下上風雨用福我南服焉

聖德懷柔羣望咸秩貔沈璋邸射之禮于神尊崇尤至冕而龍卷豆籩有加複廟重檐以稱懿號則凡閩城邑鄉聚與夫沙汭島嶼靈旗往來之所皆宜嚴事以答鴻

休重典祀況平海之天后廟疊著顯應厥有異迹者哉
平海在莆田境接艤戍守俯瞰滄瀛懷桷翼然其來蓋
久康熙壬戌靖海將軍施侯烺帥師駐此地鹵士渴禱
于神廟并甘溢萬衆以汲廡有石碣以識其事去年春
余奉命大閱舟師先期提督張公董樓船會列校佽飛
中黃扈帶鯁函之士集焉烈颶遽作波如連山艨艟膠
戾不可以師張公循前之爲亦禱于神祝已天霽風止
水恬余至鼓而陳之若魚若鶴或飛或游軍禮既成若
在平陸是雖張公之誠有以感動幽顯而自頻歲以來
百谷晏然風雨其時嘉穀屢豐神之惠闡大矣蓋我

聖天子御寓靈祇效祥隨感而應薄海內外莫不蒙株
於戲盛哉張公念廟之將壞歸率將佐輸錢召匠陶旋
規材始作于乾隆己巳夏六月至次年庚午秋七月告
成總爲費若干書來請記張公名天駿浙之錢唐人歷
典方鎮有威望今殿閨盡護舟師伏波下瀨之亞也余
辱歲事載筆而書之宜覈系以詩曰

於廓靈海惟神所治曰閩之莆神生于茲生而神靈乘
白雲飛或娛扶桑而織閨帷手把天輪以載地維於神
之懿匹古江妻亦駿厥功上踵女希服駕應龍鞭挾蛟
螭迺紮蜚廉迺嘯雨師歲沃我田有積如茨言言戰艦

在水之湄我有鏤卒履波若砥肆我羣士我鍔我稽南
至漢鉛我纓我糜繄神之佑震我武威

皇帝躬聖禮于神示德盛樂和空桑咸池十雨五風重
譯知歸神睨孔遠而莫不熙凡我官臣與爾烝黎來拜
廟下謹視此詩海波不揚

聖人之時

通奉大夫巡撫福建等處地方提督軍務都察院

右副都御史贈光祿大夫敏惠潘公神道碑

特贈光祿大夫巡撫福建副都御史河陽敏惠公葬在常州陽湖縣定東鄉姚官巷之原今大學士同郡劉公實爲文以藏諸墓初公之薨

天子眷念封疆勞績

特予祭葬易名晉階列祀賢良用一品例

恩封三世粵自癸酉公葬至今乙酉十有三年

聖駕南巡必蒙

恩遣大臣卽家致祭優渥之典在古希邁茲將有事墓

隧之刻公之子振瑩振煥來告曰以墓前石相累此先大夫易簣之言也今者三拜

盛典光賁泉壤凡所以樹墓上而垂來葉者不可再緩
敢申遺命以請余辱交公久感臨沒之屬又以賢嗣之
勿忘也乃不辭謹爲序其實而繫以銘序曰公諱思
榦字絜方別號補堂常州陽湖人其先出宋武惠公有
判常州而卒官者爲繼周公始占籍宜興明洪武初徙
郡城曾祖諱毓靈曾祖妣吳氏祖諱禹謨祖妣沈氏考
諱滋漸天長學諸生妣陸氏潘在郡城者累世隱不顯
後以公貴自祖以下皆贈如其官妣皆贈夫人公勤學

慨然有志于用世蚤歲食餼雍正癸卯舉于鄉甲辰成進士選庶吉士明年改刑部陝西司主事丁家艱歸起復補主事升貴州司員外郎充己酉順天鄉試庚戌會試同考官轉現審司郎中出守廣東之南雄考最擢海南兵備道調糧驛道就拜按察使遷浙江布政使奉命巡撫安徽移鎮福建居五年薨于位此公之所履也公性敏決明法律練習吏事力持大體而汲汲以宣朝廷德意經國澤民爲務故所至辦治而輿望歸之其在西曹獄常至夜分饑則探懷餅渝水而食每隨尚

書入奏事

先帝嘉之在南雄大水將敗城公禫神危橋俎未徹而
橋崩露宿埠塊督吏卒縛役濟溺者在瓊深入五指山
安輯黎衆効一帥一守之殘瓊人者泊秉粵臬飭綱紀
端風俗抑貪蠹鉏豪猾所部肅然而理冤獄尤多會久
旱奸民數百爲羣入市強取米公時方疾起坐堂皇立
捕數十人至痛杖荷校以徇守藩時甲子浙東大水壞
田廬漂人畜無算公出臨錢塘江收流棺瘞浮尸發運
銀粟分往賑恤其秋蕭山民匈匈渡江公曰民飢當哺
闌則亂民也嚴懲之自是迄麥登無一人敢譁者其撫
安徽也當河決淮淝之後鳳潁泗皆災公前後請發庫

廩百萬有奇拜疏親行督賑冒風渡洪澤湖舟幾覆不爲動歸奏調劑三事曰課農桑疏溝洫稽流移其言溝洫尤切得

旨俞允將次第舉行而拜移閩之

命行矣閩爲巖疆庶政繁委民情囂廣相尚以鬪訟盜匪數起公廉得其主名斐櫛而草薙之晝見官屬夜披案牘旱則步禱潦則按卹又以農隙巡行海防周閱戰艦朔望入書院與諸生講說經蓀如是者歲以爲常勞積疾作而不少止也在閩四年餘一朝京師六蒙

召對中外知

上倚任益專蚤晚期公之枋用矣公之所蒞以水利爲農田本嘗欲大治餘杭之南湖上虞之夏蓋湖壽州之安豐塘上江之澮渴溉芙蓉沙灘諸河繪圖商功皇然爲斯民綢繆牖戶計皆以離局中輒惟脩築寧德之東湖開良田萬畝復福州之西湖溉其旁數千頃幸得竣居恒與客言嘗引以爲憾也公爲人厚重寡言笑未嘗見喜慍之色臨大事能斷恤吏民若一體處公務若營其家愛士育材惟恐不及於世閒嗜好泊如也故臯復之夕賓哭于館吏哭于次士哭于塾民哭于塗卒哭于火伍其感人之心如此夫以

天子之嚮用海內之慕仰喟喟者方跂以爲相而公齒位遽訖于是豈脩短之數不繫于人耶公治諸經尤邃于易獨能探荀虞之旨嘗謂後世知有漢學者賴李鼎祚易解存耳自建節卽不攜眷之官公餘日闡注疏及徐氏經解箋釋塗乙出入一童抱畢牘自隨有得卽疏之每語學者曰學必求有用凡象緯方輿歷等鍾律水利農政何事不當留心又曰士君子當以砥行立身爲要若詞章撰著抑末耳故自去翰林益講求經濟實學雖以成之蕪陋一燈熒熒相與考訂論辨反復如老書生其虛懷好學有古人所難者公生于康熙三十四年

正月十九日沒于乾隆十七年二月十七日享年五十
有八配陸氏封夫人長振瑩見署來安知縣次振煥太
學生來速文者也俱陸夫人出女一適同里錢卯側室
沈氏出撫女二一適江陰曹甡一適江都許式紹孫一
松筠邑諸生公起寒素幼從師讀書嘗至市易薪米或
遇雨雪衣履盡溼逮後通顯洗手奉公終身非共賓客
食不重肉衣或敝紉丁卯以皖撫監臨江南省試日進
供給視舊減過半鄉人榮公而彌佩其清節也公之宅
行具詳劉公所作墓志中余惟就素所稔知者書之竊
歎公之長德鉅望中年奄逝未究其用世之志爲天下

惜也銘曰

晉陵之墟厥生偉人蓄極迺宣其祉宜蕃烈烈潘公爲時名臣原本六籍蔚爲經綸清勤果恪立

朝當官于皖于浙于粵于閩甘棠蔽芾謳頌在民公之守郡召信杜詩公之建節韓滉孔戣

天子之毗儒者之師台輔之望方鎮之規胡奪之年未究其施瞻彼峴山今古同悲迹公所行無媿三立觀之門內克諧而翕中外嫗黨亦睦以輯不遺簪履不寒車笠推其惻怛仁煦幽蟄掩骼埋骯萬鬼感泣緬公之存任兼股肱逮公之逝禮備哀榮

集卷二十三
天子省方三荷寵靈

龍章牲帛崇于大烝刻詩豐碑惟覈斯徵子子孫孫善繼善承

朝議大夫都轉鹽運使司運同栖靜張君墓碑

代
雲間張氏爲江東之世家其先居上海之筠溪里後遷於郡城當

皇朝定鼎之初有盛德積善發聞於時至今傳之爲長者曰筠齋公諱淇贈兵部左侍郎累加刑部尚書有子四其長由進士起家治行卓犖爲時名臣曰慕庭公諱集有子一由舉人登部曹出守桂林家居蒙

世廟特恩卽家拜太僕少卿曰吟樵公諱棠有子二栖靜其冢嗣也名卿雲字慶初一字栖靜爲人仁恕質厚而氣溫好學能詩文其事親以孝聞能克其家承其先

儀于其族姓者也蓋自順治至今近百二十年矣其故家右族其後或至墜其緒而清河之遺澤獨綿且大其出者固重于

朝廷其處者亦行應乎禮義若君尤爲難得者也君少具至性事太僕服勞順適逮沒執喪盡哀旣葬廬墓事母鄭恭人問安視膳朝夕罔敢懈有疾親調湯藥夜不敢寐家故有園池春秋美日則奉版輿以遊惟恐其親之不懽也其力學而卒未試于用者以奉親之故一日不忍去左右故嘗再試京兆報罷卽歸雖有籍於吏部而亦未嘗赴也其從父文敏公方在九列內外姻黨多

居華廡躋顯要過家上冢呵殿赫奕而君處之泊然不以榮達在意居恒曰第使吾奉母以終天年則吾願畢矣夫孰知親存而子先隕年甫艾而期已迫白華之志未竟而長抱膝下之慕以入地也烏嘵其可哀也已君遇其弟西圃友愛諸女兄弟之已嫁者皆爲移近歲時往來慰其親又嘗撫其孤甥教之成立又嘗收卹其中表之遺女長而嫁之其受業師沒爲刻其遺書又營葬而贍其家君旣內行脩而力於善雍正壬子松郡饑君泛舟出糴減直以市又爲糜以食餓者繼又大疫君瘞殣以千數乾隆乙亥丙子涪饑君仍如前之爲又嘗舍

棺槨施衣被治橋梁復育嬰堂使殮者藏瘠者燠涉者渡而孩棄者以活凡此皆君之行已利物見稱於鄉人者也則君之用雖不試于世而其善猶得及於鄉其孝既有聞於今茲其必有傳於後可知也君生於康熙庚寅六月初八日卒於乾隆庚辰三月初九日年五十有一以婁縣學生循例注選府同知改鹽運使司運同

誥授朝議大夫母吳氏繼母吳氏俱贈恭人生母鄭氏亦封恭人妻王氏封恭人子七人岳孫諸生前君卒穀孫國子生隆孫布政司理問硯孫培孫殤頤孫芳孫女二人長適諸生王承曾次幼未字君之諸孤於辛巳二

月某甲子奉君之喪葬於某縣某圖之新塋既請今都
察院左都御史董公邦達誌其隧道以墓門之石未立
也復來請曰願有述松與禾壤接君之親若友余舊或
媢好也往在秋官文敏實爲寮歸田後數往來雲間故
稔君行最詳而孝尤著洵不愧世家子也系以銘曰
烏嗥張君孝而純旣含猶視懷其親才韁不暴待後昆
貞珉有泐名永存

接引菴義塚碑 代

西湖接引菴直桃源嶺下行春橋之西唐刺史袁公九里松路也菴旁義塚三蓬顆而鼎列凡爲畝一百有三明太監孫隆置者六十二之五我

朝督府李敏達公置者十九之二而二十有一之四則善士冷初陽所捐也其地址李與孫近當菴之後冷稍遠傅行春橋趾督府置者在雍正戊申民已侵其半冷氏地石窣堵僅存孫地最廣年最遠乾沒以市虎而喟者最甚杭俗休于火富家右族大率攢湖壘其寒人萌隸則假屋以庇櫓檻桷之屬傑然甚且淋炙雨日中

而官所置漏澤園復爲民盜占肆者什不得一焉可憫也余以薄劣守藩幸際

聖主惠鮮之仁澤逮枯朽行臺兩憲長勤宣

上德凡有埠邦人者次第講求余何敢自逸于下嘗親至是菴周行相視廉得羣猾窟穴繼其魁檄郡縣窮治悉清侵占還官于是三義塚之地始復迺榜鄉亭避官屬除茀歲飭畚耒凡城內外之流停暴露者俱剋期日昇瘞無主而力不足官爲給費李冷二義塚四棺一封孫瑞義塚一棺一封樹碣書其姓氏別爲簿以稽月日區左右望使男女不瀆若夫婦則祔留空便民展祭其

棄殖骨餅羣聚而掩之外埠土爲塚崇厚若干尺以限
芻牧爲大溝于塚內深廣如塚之數行潦之往來不瀦
也爲門以時啟閉職其鑰于菴僧民有欲遷去者聽是
役也憲副高密單公與余同請于大府鉏羣猾出俸錢
以底于竣事凡瘞棺骸三千有餘計土石工傭之費七
百緡孫瑞之地猶未滿一隅也昔韓安陽在并州以官
錢市田數頃給民安葬余何敢妄希安陽然惟以斯民
之形骸還之于地不留憾于鳥鳶炳姑以庶幾乎古蜡
氏之爲而上宣

聖主澤祐之恩下有以慰孝子不得已之隱其亦可諗

于衆也拓而廣之尚望來者其圖圩弓步四至及奉豁額征歲漕之則別鐫碑之陰而候補運副吳君家龍施君繩武皆有勞亦附書焉

翰林院編脩沈瞿菴先生墓表代

翰林院編脩沈瞿菴先生既沒之二十四年康熙丙戌始克葬又二十四年雍正庚戌其遺孤曾同以廉孝來爲吏南中清幹而勤厥聲大起乾隆庚申之夏余將去粵曾同亦乞養歸吳泣而言曰先君之葬鄉先生施君震銓寶銘于隧道惟是墓上之石久猶未刻敢以爲請余與先生忝後進且美哲嗣之克荷世德而能其官以無辱其先人遂爲之書曰先生諱旭初字寅生江南長洲人也嘗自號瞿菴故學者稱瞿菴先生少從祖貫補崑山博士弟子乙卯登賢書丙辰成進士改庶常散館

授編脩壬戌奉

命出典貴州鄉試歸道卒于江西

聖祖仁皇帝在御之二十二年也先生生有異稟讀書過目成誦其爲諸生時與故宗伯慕廬先生同懷兄弟意亭東田二君相切劘爲詩文下筆數千言旁觀咋舌而先生退然韜抑無自矜之色吳中自復社後爲文酒之會者慎交同聲二社最盛先生兄弟與慕廬先生居同聲中並驅壇坫士翕然附之得先生一言以爲重當是時海內爭願交先生四方賓客至者皆主先生家先生世鼎盛一再娶皆裝送鉅萬性樂施予勇于爲義人

有緩急告者無不滿其願而去未數年揮斥殆盡嘗歲暮有故人爲達官于浙遣使奉千金爲壽先生念戚友有不給者一日分用之自取衣襍質錢度歲家人或竊議不顧也其在翰林宏獎風流接引後進汲汲若不及士有寸長一得必力爲延譽其于後門寒素煦之尤至時健菴慕廬兩公號能得士而先生爲冷官處散地戶外之屢幾與之將盡其輕財篤氣類出于性生故能得物望如此其典點試也所取士梅君建夏君文炳張君應詔卓然有治行而解首劉君子章後爲名御史當天子詔開鴻詞大科先生所薦在選者居其四其他游

門下而有聞于時者甚衆可謂知人善審擇者矣先生事親孝內行脩謹一門羣從友愛無間先世自蘇徙崑山高王父諱紹慶嘉靖癸卯領解北雍庚戌進士提督雲南學政曾王父諱堯安贈大理評事復居郡中王父諱應明萬歷己未進士武選司郎中父諱世奕順治乙未進士內翰林秘書院編脩先生旣入翰林其季東田已未亦選庶常父子昆弟踵登館閣時以爲榮沒在癸亥十月初七日距其生順治乙酉四月初九日得年三十有九先娶王氏明大學士文恪公曾孫女後娶盧氏俱先卒側室宋氏是生遺孤曾同以明經舉孝友端方

官番禺知縣封其母并請旌焉女二人長字秦實然未嫁卒次適韓御李柏鄉知縣慕廬先生之子也孫四人景瀾今爲翰林院編脩景嗣景紱景祿曾孫四人文炳猶龍棟梁玉田方先生之沒也旅櫬荒江遺孤在腹喪歸生平義故暨內外姻黨流涕相告無不爲先生痛者乃數十年之後苑枯頓易子孫相繼翔步亨塗餘慶之流蕃衍焉奕吾愈歎善人之食報無窮而天道之果足恃也先生之嘉言懿行已載志銘者茲不著著其交友之篤出處無貳如此

前廣東惠州府永安縣知縣徐君墓誌銘

代

誌銘者信今而傳後也不與友不知其人不身履其地
不習其治行而輒執筆爲書今不信矣安望後之傳若
是又焉用銘徐君余同年友也嘗令惠之永安余守雄
至爲提刑在南者十餘年君已去永而吏民多道其治
行丁巳君再入粵歸後遂不相聞丙寅秋余來晚江君
之子聰以狀泣請銘蓋距其沒六年矣余旣同年友知
君最深于法應得銘者也君名允年字邃菴其先自江
西南昌徙居舍山運漕鎮遂爲舍山人中庚變故其世
之可知者曰某是爲君曾祖曰某是爲君祖有子二其

適某君之考也。能醫貧者躬載藥往療之初聚張氏繼
倪氏卽生君者也。君康熙甲午舉于鄉逾十年雍正甲
辰始成進士以選人客大司寇勵公所爲治文書己酉
用前京兆余公薦遂出尹縣君旣精法律善決獄旁縣
之疑者諸使皆屬聽之所讞無不允狂生某妄告人反
君燭其奸爲申列誣者抵舉全活甚衆永萬山盤互多
竹隣盜潛治其中時出刦殺人君至縣之明年奉臺檄
往捕親與賊格鬪盡縛其黨以歸而同行戍將失期後
至以是媚君能心曉之未數月卒有與民訟者不直君
持之急遂聚而譟卷旗幟出城去戍將不爲戢事聞卒

坐誅將褫職而君已調文昌亦牽累失官初君之再入
粵也因前提刑安居王公而余方監漕倉與王公同官
相得每過君攤書滿几丹墨筆淋漓取視六經也居二
年遂別去而君已病矣君內行脩潔奉親孝遇弱弟友
愛性嗜學寒暑困疾不去手其子王公禮部同考事之
尤篤公爲江東漕時有謀傾之者君策一衛馳風雪數
百里三晝夜不交睫事得解公嘗語余徐生吾倚之若
子姪而君亦曰吾師猶吾父也迨公建節君又將赴之
瘍發而止疾革口占爲書遙與公訣嗚呼師弟若此難
矣君生康熙丁巳四月初十日卒乾隆辛酉五月十一

日娶楊氏能助成夫之志子五人長熊先卒次耶來乞
銘者也次貞彭貞且貞儀其簉馮氏生孫二人從恭從
寬皆熊之子也君以吏才自負中廢嘗踵御史臺懷牒
自陳

天子方下詔錄用故絃誤官而當時無有爲君白其事
者及重遊嶺外往與君同尹于南者或已爲監司右職
而君一蹟不復振嗚呼此余所爲深悲者也銘曰

剛則缺兮韜而藏身湮阨兮系必昌吾銘惟信兮永有
光

奉直大夫雲南大理府知府汪君墓誌銘代

乾隆丙寅八月雲南大理府知府汪君以疾卒官其孤
孟鋗自京師萬里奔赴次年七月奉喪過皖來告哀繼
因吾友上海喬君廷選具狀請銘以余曩藩于浙而君
元貫徽適在部內習其家世行業甚詳爲之請者又喬
君也誼不可以辭按狀汪氏系出唐越公華其遠祖遷
婺源者曰道安再遷休寧者曰接自接以下五世曰漢
者支分爲七其長文彬卽大理所宗也數傳至可鎮是
爲君高祖始遷嘉興之桐鄉縣可鎮生淇是爲君曾祖
皆再贈至中憲大夫仲子文桂中書舍人君祖也叔子

森戶部郎中與同里朱檢討錫鬯周布衣貧遷刻詞綜
藏書甲于浙西自號碧巢者也中書子亦四其次繼燦
歷官給事巡臺灣有聲爲後于碧巢君考也子六君行
三弱冠補學官弟子給事旣歿始奉母張太宜人定居
郡城連應鄉舉不得薦慨然有功名之心雍正乙卯以
軍興入粟佐邊起家爲郎初授盛京刑部員外內轉戶
部擢刑部郎中乙丑出守大理府逾年遂卒曾一遇
覃恩封奉直大夫君在陪京所聽獄皆禁軍大校譟訴
繁積手批口斷事無停壅
今上御極初將拜

三陵載命親王大臣臨視將作選難其人而君獨以敏
幹兩與大工迄成第勞居首山東司主天下鹽兼復引
曹務最勦吏叢穴爲奸君芟蕪肅然湖北巡撫崔公與
淮南鹾使爭鹽直會議朝堂君前陳利害甚切疏入竟
從君議其在刑部河南司讞獄稍矜卽反覆廷辨令甲
司官能駁正成案者案定議敘君爲郎五年先後獎異
獨多君所守郡漢葉榆姑繒地在滇西南控制夷獠提
督重兵駐焉號雄望難治君外異而內剛遇事能斷至
未數月僚吏信睦庶政脩飭境內大和君旣自曹郎出
諳故事明法律它郡有疑獄諸使並以付之嘗奉檄赴

臺慮因而所部雲龍州徼外夷早可與片馬仇殺君偵知其情遣官屬馳往撫慰開以誠信俱帖然聽命君諱上培字綺巖生康熙壬午九月十九日卒乾隆丙寅八月十九日年四十有五其疾也以勞役傷渴誤餌棗桂遂篤配祝氏封宜人有婦道前卒子孟鋗仲鈺季鏗其簉所生則彝銘也俱國子生孫二人如藻如洋卜于戊辰十一月二十七日葬君海鹽縣山茶花灘之原啟祝宜人窆而肆焉君生平篤孝友慎交與周貸濟人不少倦而奉身廉儉砥厲清節有人所難能喬君每爲余言君之居鄉當官事子姓尚多不及知者狀僅得什一二

耳然卽其著于篇者準諸前軌蓋無媿篤實君子矣乃
年未五十奄然窮荒萬里之外先親而殞可悲也夫銘
曰

越國之祐燕及後昆自歛僑禾圭組紛綸維碧巢君有
道而文嶽嶽給事于臺于垣大理紹之萬里滇雲克宣
其勞亦清厥芬刻銘幽堂曰斯良吏之墳其永以存

封奉直大夫刑部四川司員外郎李君墓誌銘代

閩有篤誠好善之君子曰李君重山者余壬午同舉建極之尊甫而蘇州郡倅雲龍之大父也余旣辱與建極齊年得悉君爲人洎雲龍以故人子往來邸中益習其行義蓋心儀之久矣丙寅春雲龍自吳奔君喪條件事迹具書泣請銘余未暇爲越三年庚午秋君配鄭恭人繼沒其明年雲龍將合葬大父母啟窆有時書來趣銘按狀君諱範字士疇重山其號也曾祖愛吾祖弘我生三子長曰端衡是爲君考次曰某某俱蚤卒世居福州之玉融其祖始遷磁窑後以避海氛其考復徙福寧三

徙乃定居郡城之花巷自祖以上皆不顯考始封儒林
郎而君亦以仲子貴封奉直大夫如其官甫三歲誤墮
虎穴不爲所陞宗黨競指目君知其非常兒矣旣壯海
上禁弛君顧家貧父母老思欲釣奇自振遂去賈吳其
羸過當則與族人共造大舟浮海而出所至荷蘭日本
呂宋之屬咸信重君貨輒先粥它賈或覆溺折閱而君
履蛟鼉出沒風濤歲時歸拜其親所居息數倍君旣饒
裕而內行脩謹儒林之沒獨處丙舍者十年其在吳營
大廈南濠以栖鄉人今三山會館也弟某之二孤君析
著與子均從弟中丞公罷官居江東閒闢往省比歸餽

問之使日至自仕宦洎垂白家居用君營巨萬未嘗有閒言康熙丁亥閩大饑君命子建極爲官告糴于吳自輸錢二百萬佐之乾隆乙亥

詔免天下賦君首蠲其田租其它作家庸繕鑿校理唐觀察使陳巖故冢爲屋以祠與夫利物濟人分苗振乏凡有益于姻族鄉閭者見無不爲爲之無不力而余蓋不勝其書也嗚呼洵爲篤誠好善之君子也君卒乾隆丙寅三月十七日距其生順治庚子某月某日年八十有七配鄭恭人福清白石名族爲婦爲母皆足法式性仁恕明大義凡君之孝友曰篤而德行于鄉者恭人有

助焉生康熙甲辰十一月初五日卒乾隆庚午九月十四日年亦如君之永子三人皆前卒建極康熙壬午舉人建勲刑部四川司員外郎出爲弟士章後朝棟國子生女四人皆適士族孫七人雲龍蘇州府通判

來乞銘者也某亦前卒某某某孫女七人曾孫若女十二人以乾隆十六年十月某日合葬某里之某原銘曰彼壽與富居疇之首上帝所靳或予或不史公有言以末致財用本守之君善多矣天宜厚之嗚呼斯君子之臧尚有耀于後

鄉飲賓國子監生徐君墓誌銘

鄉飲賓徐君怡圃卽世之次年其諸孤爲堡等將卜日
啟窓而葬先期條件事迹來請銘以君之長厚好善惠
在井閭齒垂大耋賓於

國家鄉飲酒之禮爲時吉人是合銘法乃爲之書曰古
鄉飲酒之禮有四諸侯之鄉大夫三年大比獻賢者能
者於其君以禮賓之與之飲酒謂之鄉飲酒一也六十
者坐五十者立侍黨正飲酒于序以正齒位亦謂之鄉
飲酒二也州長春秋習射于州序先行鄉飲酒三也鄉
大夫飲國中賢者用鄉飲酒四也然三年大比賓賢之

禮古以正月行之黨正正齒位於季冬蜡祭行之鄉大夫飲國中賢者無常時今

制鄉飲酒禮則行之以正月望暨十月朔郡縣選舉以申藩伯而請於憲長必慎必覈式孚羣議行禮之日吏民畢會爭指目之以爲榮是故六十者坐五十者立侍所以明尊長也六十者三豆七十者四豆八十者五豆九十者六豆所以明養老也民知尊長養老而后能入孝弟教之以鄉飲酒之禮而孝弟之行立矣是

天子尚德引年之盛典也在是位者其人綦重矣哉君之爲鄉飲賓也在乾隆二十五年正月會余自廣陵歸

因往觀禮蓋無不道君之長者克稱是典而頌賢使君之能得人也今按君之行而證以當日之所聞益信其不誣焉君名秉烈字日宣怡圃其號也性仁恕孝友慈愛稱於門內睦姻任卹施及宗鄉其不能昏嫁及不能棺斂者助之其尤困苦者則歲時周之以是族人外姻翕然無間言雍正壬子癸丑之間歲漸饑君旣爲糜于龍潭超果二寺以食餓者又蠲櫛席收瘞道殣乾隆辛酉君倡復普濟堂獨力仔肩者五年不足則以己財濟之其它若收遺嬰掩暴骸葺梁杠夷野涂更僕難數也以是前後郡縣之長或題其楣或式其廬或舉以爲善

人而君退然歛然不敢自居故其爲鄉飲賓也一郡之人咸推重焉徐氏之世其先始自勝國中山王其八世祖恂贊於吾郡之金山衛逮五世祖承恩徙上海子四其伯子日章七歲治五經是爲君高祖考妣張氏子三俊少餽于庠有文名是爲君曾祖考妣李氏子寅揆始遷郡城是爲君祖考妣王氏子二其伯子王棟以高才生充貢爲太平府當塗縣教諭是爲君考妣陸氏有子殤繼諸氏是生君妻縣國子監生乾隆庚辰鄉飲賓生康熙三十年三月二十九日卒乾隆三十三年八月初一日年七十有八配唐氏前卒而先葬兆在上海縣二

十九堡一區一圖祖塋之後而君自築壽藏今茲襄事
子四人爲堡爲塙爲壠爲墉其仲先卒皆側室閔氏出
女三人其孟先卒側室沈氏出餘亦閔出孫三人林錫
士錦祖鎔銘曰

展也黃髮鄉介賓以完歸親還其真掩詩於幽告後人

正四品廕生庶田吳君合葬墓誌銘

君諱澄字蓉川蔗田其別號也其先世居歙明初徙浙
當萬歷時五世祖諱從政始遷江南之松江遂爲郡人
以甲辰進士歷官直隸易州知州妣龔氏封安人高祖
考諱文彥舉鄉飲賓妣葉氏曾祖考諱士升妣金氏張
氏祖考諱元龍甲辰進士弘文院庶吉士累遷工部都
水司郎中以博學宏詞授翰林院侍講妣陳氏姜氏考
諱廷揆癸巳進士歷提督四譯館太常寺少卿妣王氏
相國文恭公之女也自曾祖考以下皆贈封如館卿官
妣皆淑人館卿有三子長濬次猷暨一女子皆王淑人

出而君居季其所生母則錢孺人今與君俱葬於新阡
者也君幼慧王淑人愛之過於己生甫十二歲恭遇
世宗憲皇帝御極恩以正四品廕入監讀書次年王淑
人卒又一年館卿亦卒君從仲兄奉喪而歸塗次哭踊
哀若成人弔者爲之歎息君旣壯自以家世通顯內外
族姻皆科目起家雖蒙

恩得注任子仍欲由制舉進益發憤爲學前後所從師
率名人魁士而里中四焉齊文會諸子皆折輩行定交
切磋鑽厲以是治經著文其譽藹鬱凡五赴京兆一至
金陵當時賢士大夫爭愛其才而君亦慨然有志功名

思爲

國家效豪末以紹先緒而連謗於有司鬱鬱不自得年未五十病瘻而卒此知君者所爲恨惜無已也君爲人謙退恬靜寡欲性仁恕勇於爲善居恒屏遠聲樂飲博之習遇後門寒素握手譚蓀殷勤不倦以是人益樂親之嘗買一妾君詢知曾許字人立還其父母有故宦子鬻爲人奴君倡議贖歸授經師張噩庭在殯君率同門爲之葬戚某有子貧不能娶君爲之婚迨卒爲之經紀其喪祖遺祭田幾廢君力存之歲以其羨贍族之匱乏者君工制義閒爲詩歌亦清雋可誦所著有鳴春草村

居倡和集吟香書屋稟自次年譜總爲若干卷嗚呼君詩文不多見而每爲士友所稱其行義不博聞而祇爲親鄰所述重以余之衰陋而言之不文故論次止於此君初娶陳氏翰林院檢討諱世侃女相國文勤公嫡姪孝謹慈順能盡婦道來歸一年卒繼宋氏山東沂州府知府諱映女相國文恪公族孫女君家中落宋孺人有再造功嘗曰治家如治國不經久不可以示子孫法先祐其獎耳嗚呼至言也有子四人曰昕嗣宗光泰孝獻昕乙酉順天舉人嗣宗歲貢生孝獻附學生其叔子光泰有文而殤今別葬城內女二人其一側室徐氏出俱

配士族孫若干人曰某某孫女若干人皆幼君生康熙五十年四月初四日沒乾隆十九年七月二十六日年四十有四陳孺人生康熙五十二年七月十九日沒雍正十二年六月十五日年二十有二宋孺人生康熙五十三年四月初四日沒乾隆十七年三月十五日年三十有九合葬於金山縣五保之新阡從錢太孺人之兆乾隆三十四年十二月初八日也凡婦之生卒例不書而此書者以兩孺人皆有賢行且孝子志也徐氏自君亡守節已二十年故斯預築生壙以俟祔銘曰

才足以顯而試莫之收行足以永年而命不猶嗚呼吾

友厥後克振兮可以慰於幽

太常寺少卿吳公側室錢孺人墓誌銘

己丑之春余歸自廣陵故人子吳昕踵門告曰昕兄弟不肖不天幼失怙恃痛先君之逝十六年所生先祖母繼沒亦十三年矣以窀穸之未事夙夜疚惕今茲幸卜有壤將葬先祖母於新阡而奉先父母以祔敢請銘謹按狀昕之父正四品廕生諱澄母元配陳孺人繼宋孺人是生昕兄弟者也其大父提督四譯館太常寺少卿諱廷揆適王淑人皆先葬而今窆新阡之錢孺人則館卿之側室恩廕君之生母也孺人系出清素嫵德馴行聞於里中父處士諱某居近館卿第王淑人稔知其賢

勸館卿具禮納焉當是時館卿之大母張太夫人母姜
太夫人俱在孺人從王淑人視膳問安唯時唯謹姜太
夫人嘗有疾左右侍奉衣不解帶者數月以是得兩世
堂上歡王淑人倚之日深視之若女兄弟也洎館卿成
進士官京師王淑人以事留南命孺人先行攝內政越
一年淑人始至邸中井井顧而喜曰若善理家吾助也
自是迄館卿世中饋之職皆孺人代治焉蓋孺人天性
儉勤不尚華飾事上以慤御下以誠其於兩太夫人暨
女君甘肥膾膾之必調也其奉祭祀歲時魚菽之必潔
也其自律澣濯紡績紩綴之必苾也其育子女寒暑燥

溼之必時也以是王淑人恩禮有加始終無間迨卒孺
人哀思至老不衰王淑人可謂知人矣孺人喜書史曉
大致初恩廕君之捐館舍也听兄弟自塾出孺人必詢
課之勤惰諸孫夜讀則篝燈以待閒不中程則撫而泣
以是益奮厲迺孺人以哭壯子故久之亦沒不及見諸
孫之成立爲可悲也孺人有子一卽恩廕君先卒女一
歸歲貢生張雲苞吏部考功司郎中諱仕遇子孫四人
今存者昕嗣宗孝顯昕來請銘者也曾孫若干人具詳
恩廕君誌中孺人生康熙二十年六月十五日沒乾隆
二十二年正月二十二日新阡在金山縣五保一區某

圖某字圩之原葬以三十四年十一月十八日某山某
向余與恩廕君友而斯又嘗問業故旣次太孺人之行
而復爲之銘曰

於嘉孺人孝祇順飭來簉吳宗克彰女德其承斯何婉
婉令儀其翼斯何訛訛有貽龕有吉卜方大茀祿吾爲
銘詩永奠安宅

先師周震堂先生墓碣 代浙江金大參

乾隆某年某月日先師周震堂先生以疾卒於家中之
楞嚴寺貧無以葬越若干年甲申溶典漕來浙與同門
釋明中率其遺孤世誠葬先生於秀水縣南秋字圩之
原是年冬十月某日也旣葬謀立碣以表於墓敬爲之
書曰先生姓周氏諱廷熹字會升一字震堂浙之秀水
人曾王父某妣某氏王父某妣某氏考某妣某氏家世
長者潛德韜光是鍾於先生先生幼而孝稱於家長而
學聞於里開門授徒著籍者甚衆雍正戊申先生因同
鄉太常陸公之招始來京師浴與弟洪濱皆從問業焉

先生道貌古心不妄言笑講課餘暇與先府君談執恒至夜分雅不嗜飲唯吸爆栗進茗汁數甌而已。客幼羸善病父師均憐惜之嘗從先生於都城外之南園誦讀聲稍高先生輒語曰父母唯其疾之憂若獨不念之乎園有竹數竿已酉春連苗巨筍三先生顧而喜曰此爾輩文字之祥也盍識諸嗣後溶兄弟倅掇科目克如先生之期屬然先生不及見矣烏擣其胡可忘也耶先生講學論文以切實爲要不汲汲於名利每言富貴功名當聽之於天非己之所得而主學問道德宜盡其在己非人之所得而助其教門人最重大學八條目曰此聖

賢教人切要處須實實體驗見諸躬行方見爲學之益
今先生沒已數十年提命如新晨夕自省因得從宦以
來兢業自將奉職鮮戾不致貽先人羞者皆先生教也
先生研治六經工文章往來南北闡屢薦而輒躡先生
曰吾學不至耳非有司之過也未嘗絲毫懶見於色其
安命又如此先生生於康熙某年月日沒於乾隆某年
月日以國子監生考授州同配卓孺人先卒合葬於墓
次子一世誠也先生少孤事王父母三十年左右順適
其與人交一本至誠性剛方面折不能容人過家雖貧
能急友朋難於信於義奉以終身溶庚戌成進士榜首

周君濬浙人而沈君昌寅昆季又先生同鄉聞先生之行益詳證以宿昔之所見高山之仰哲人之痛其何時已哉初先生讀書於楞嚴寺明中年尚穎聰慧絕人先生因收爲弟子甲寅先生自京師病歸養靜寺中竟以不起洎溶由御史出守漳常以先生窀穸爲念而明中主席聖因促其孤赴閩不果來今年秋溶至明中一見卽以爲言遂相與卜地營兆啟建而襄事且爲立碣墓上庶後之慕先生者過而知其梗概焉

亡兒一震空志

兒名一震字東發又字伯高生雍正八年七月二十三日沒乾隆十四年六月十八日年二十早慧治易詩書左氏春秋三禮皆通乾隆己巳春試經解名隸郡庠之三出學使番禺莊公有恭門讀書致疾聘龔氏未昏卽於是夏病瘵卒祔葬新阡之穆次烏號兒墮地余遊金陵四歲客嶺南十二歲予從閩中丞巴蜀王公恕朝京師憩家三日自是客浙客皖閒歸恒不及旬戊辰春從晉陵潘公再入閩越一歲冬歸而兒不見矣兒性孝念余之突不黔皇皇謀食也私與母言願爲經師以息余

老學成可以爲人師矣而遽病以天烏囉兒爲吾子二十年在吾左右者四三年耳聚萬卷書吾今囉昇宗緒一綴吾老何倚天乎酷哉乾隆癸酉春三月旣望兒空目父沈大成泣志